

Date – 19/08/2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Ni 2 awh Mizoram legislative assembly fur thukhawm chu natukah tan a ni ang.**
- 2. Kumin chhunga vawk pul hri -ASF avanga Mizorama vawk thi zat chu 10,000 a chuang tawh.**
- 3. External Affairs Minister Dr. S.Jaishankara chuan India leh Kuwait inlanchinna chu kum za tam tak lo awm tawh a ni tih sawiin zawi zawiin a lian chho zel a ni a ti.**
- 4. Principal Secretary to Prime Minister Dr.P.K Mishra hovin Mpox hrileng mek hmachhawn tura inpuahchahna leh hmalakna hrang hrang high level committee-in nimin khan a thlirho.**

<><><>

SESSION

Naktuk, August ni 20 atanga tan tur Mizoram legislative assembly fur thukhawm atan sorkar atangin dan siam tura duan 5 a lut tawh.

Assembly secretariat atanga thudawn danin Thawhlejni a tan tur ni 2 awh assembly fur thutkhawm lo awm turah hian dan thar siam tur 1 leh dan dinglai simthat tura rawtna 4 a lut tawh a. House chhunga chhan tur chi (starred question) 263 leh ziaka chhan chi (unstarred question) 17 a lut tawh bawk a. Hei bakah hian Social Welfare & Tribal Affairs minister Pi Lalrinpuii hnen atangin official resolution putluh tur an dawng tawh bawk. Assembly inkhawmah hian MLA hlui, Gorkhali hnam zinga Mizoram assembly-a MLA atana ruat hmasak ber leh awm chhun Pu Kapoor Chand Thakuri sunna hun an hmang dawn a. Pu Kapoor Chand Thakuri hi kum 1972 a Mizoramin UT a nih ruala assembly a neih khan Pi Saptawni leh Pu Lalhmingthanga te nen ruat seat-ah, khatih lai a Mizo Union sorkar khan a dah a ni a. Kumin July ni 15 khan Nepal khawpui Kathmandu-ah a thi a ni.

Assembly Fur thutkhawm hi August ni 20 a tan turin larsap Dr. Hari Bambu Kambhampati chuan a ko a. August ni 1 khan Speaker Pu Lalbiakzama kaihhruai Business Advisory Committee (BAC) thukhawm chu inkhawm hi ni 2 ni tura relin August ni 20 leh ni 21 khian an thukhawm dawn a ni.

<><><>

BORDER FENCING

Sorkar laipui-in Mizoram leh Myanmar inkar ramri hung tura a tih chu Mizoram sorkar chuan a la dodal zui zel.

Sorkar laipui-in India leh Myanmar inkar ramri km. 1,643 a thui hung chungchangah Arunachal Pradesh leh Manipur sorkarte Ministry of Home Affairs-in tun hnai a na taka a nawr lai-in Mizoram sorkar erawh chu a nawr na ve vak lo ni a hriat a ni a, nawr hauh lo erawh chu a ni lo. Home department hotute hnen atanga thu dawn danin Ministry of Home Affairs hian hun hma lam deuhah khan Mizoram leh Myanmar ramri km. 404 a thui hung tur hian a rawn ti a. Sorkar hmasa leh tun sorkarin a dodalna-te chu Ministry of Home Affairs-ah thawn thlak ve ve a ni. MNF sorkar lai khan council of minister thukhawm chuan ramri hung an dodal thu hi thutlukna an lo siam tawh a. ZPM sorkar pawhin dodal chhonzawm zelin assembly-ah ramri hung an duh loh thu hi sorkarin pulutin assembly chuan lungrual takin a lo pawm tawh a.

Hemi chungchangah hian home minister Pu K. Sapdanga chuan kumin February ni 28 khan Myanmar nena zalen taka inkalpawh tawn theihna tihtawp leh ramri hung tura thutlukna dodalna official resolution chu assembly inkhawmah a pulut a. He resolution hi lungrual taka pawm a ni. He official resolution-ah hian zalen taka inkalpawhna titawp lova ramri hung bawk loh bakah ramri tawn tawna awm Mizote inzawmkhawmna atana thawk zawk turin sorkar laipui chu an ngen nghal a ni.

Union Home Minister Amit Shah chuan kumin February ni 6 khan sorkar laipui-in Myanmar leh India hmarchhak state 4 - Arunachal Pradesh, Nagaland, Manipur leh Mizoram ramri chu hung a nih dawn thu leh zalen taka intlawhpawh theihna dan pawh hlih a nih thu a puang a. Hei hi Mizoram leh Nagaland sorkar bakah pawl hrang hrangin an dodal nghal a. Mizoramah chuan tlawmngai pawl inzawmkhawm NGO Coordination Committee chuan larsap kaltlangin Union Home Minister hnenah hian sorkar laipui thutlukna an dodal thu an thawn nghal a ni.

Economics lam mithiamte chuan ramri a zalen taka intlawhpawh theihna hlih leh ramri hung hian Mizoram leh Myanmar ramri a cheng mi tam tak ei leh bar bakah sum leh pai dinhmun a chhe zawngin a khawih nasa hle dawn niin an sawi a. A bik takin Champhai district a ramri a insumdawna hmun Zokhawthar leh Myanmar lama chengte bakah ramri a insumdawn tawna dang 'border haat' chhawr tangkaitute chuan eizawna kawngah harsatna an nei nghal dawn a. Mizorama chengte bawngsa ei za zela 90 chuang hi khilam atanga lakluh a nih avangin Mizoram pumin harsatna a tawk nghal bawk dawn a ni an ti. Ramri hung a nih chuan Mizoram lam ramri a chengte'n Tiau lui kama an nul-te enkawl thei lovin Tiau lui sangha hmanga eizawngte pawhin harsatna an tawk nghal dawn niin an sawi a ni.

<><><>

FOOD FOR IDPS

Sorkar laipui chuan Mizorama raltlan awm mek mi 45,000 bawr velte tan buhfai cheng vaibelchhe 5 hu pekna tur ruahmanna a siam.

Ministry of Consumer Affairs, Food and Public Distribution a Under Secretary Subrata Sanyal chuan August ni 14 khan Mizoram Food, Civil Supplies and Consumer Affairs secretary hnenah lehkhaw rawn thawnin cheng vaibelchhe 5 hu buhfai metric tonne 1,379 leh quintal 34 chu raltlan, a bikin cyclone Remal leh khuarel chhiatna dang tawkte'n a thlawna an dawn turin a rawn pe a. Hei hi ni 60 chhunga chinfel vek tur a tih a ni a. A senso hi Ministry of Home Affairs chuan a rawn tum vek dawn a ni. Home department hotute chuan Food, Civil Supplies and Consumer Affairs department nen tangrualin buhfai lak leh semchhuah hna hi an thawk dawn niin an sawi a, district bawrhshapte'n district chhunga raltlan awmte'n an mamawh an thehluh anga sem a ni dawn a ni.

Tun dinhmunah hian Mizoramah raltlan 45,000 thelh an awm mek a. Sorkar chhinchhiah dan thar berah chuan Myanmar atanga raltlante hi 33,724 an ni a, an zinga 10,800 te hi hmeichhia niin 12,765 chu naupang an ni. Myanmar raltlan Mizorama awm zinga 16,979 -te hi an puala sak relief camp 129-ah awm mekin mi 16,755-te erawh chuan an chhungte leh thiante an belh bakah mahni a in luahte leh mi hnuai a thawkin ramhnuai thlamah chhungkua-in an awm chilh bawk a ni. Myanmar atanga raltlan rawn lutte hi February ni 1, 2021 a sipai-in thuneihna an hnehchhuh hnu atanga rawn lut tan, tualchhung indona avanga rawn luh belh ta zel an ni a, Mizoram district tinah an awm a ni. Champhai district-ah tam berin mi 13,966 zet an awm a, Siaha district-in dawtin mi 5,953 an awm a, Lawngtlai district-ah mi 5,922 an awm bawk a ni.

Bangladesh Chittagong Hill Tracts atanga raltlan lo lut la awm mekte hi mi 2,014 an ni a. Bangladesh atanga rawn raltlante hi district dangah awm lovin Lawngtlai district-ah chauh an awm a. Anni hi Chittagong Hill Tracts a cheng zofate tana thuneihna sang zawk ngiata ralthuam lektu Kuki-Chin National Army (KNA) leh Bangladesh sipaite inkah fo avanga rawn raltlan an ni.

Mizoram thenawm Manipur a nikum May ni 3 atanga Meitei leh zofate inchemharna avanga Mizorama rawn raltlante hi hriat theih hnukung berah mi 8,951 an ni a, district 9-ah an awm a. An zinga mi 1,294 te hi Aizawl, Kolasib leh Saitual district a an puala siam relief camp 23-ah khawsa-in mi 7,657 te erawh chu an chhungkhat laina leh thiante an belh bakah mahni in luaha awmte an ni.

<><><>

ASF UPDATE

Kumin chhungin African Swine Fever (ASF) vawk pulhri leng avanga Mizorama vawk thi zat chuan 10,000 a chuang ta a, vawk suat zat pawh 18,000 a chuang ta bawk.

Animal husbandry & veterinary department hotute hnen atanga thu dawn danin nimin khan ASF vawk pulhri vangin district 4-ah vawk 60 a thi leh a. Khawzawl district-a Chalrang khua-ah vawk 26 zet a thi a ni. Heti hian kumin February ni 9 a Champhai district Leithum khua a ASF vawk pulhri vei

hmuhchhuah leh a nih atanga tun thleng hian vawk 10,041 a thi ta a. He vawk pulhri hi tunah hian khaw 209-ah a leng mek niin department hotute chuan an sawi a ni. Nim,in vek khan district 5-ah vawk 58 suat a ni a. Hemi tiam hian kumin chhunga Mizoram chhunga vawk pulhri darh zel tur venna atana vawk suat zat chu 18,250 a tling tawh bawk a ni.

<><><>

EAM IN KUWAIT

Dr. Jaishankara chuan India leh Kuwait inlainchinna chu kum za tam tak lo awm tawh a ni tih sawiin zawi zawiin a lian chho zel a ni a ti. External Affairs Minister Dr. S. Jaishankar hian nimin khan Kuwait Crown Prince Sheikh Sabah Al-Khaled Al-Sabah Al-hamad Al-Mubarak Al-Sabah a kawm a. Crown Prince chu inlaichinna tha nei tura a kaihhruaina leh a hmathlir tha tak avangin lawmthu a hrilh a ni.

Dr.Jaishankar-a chuan Kuwait Prime Minister Sheikh Abdullah Al-Ahmed Al-Jaber Al-Sabah pawh kawmin India-Kuwait inzawmna thuk zawk awm tura a thlir dante a hrilh a. Eibar zawmna lama ram pahnih thawhdunna pawh tihlen zel dan tur a sawipui bawk a ni.

External Affairs Minister hian nimin khan Kuwait a thleng a. A cham chhungin ram pahnih inkar thil pawimawh tak takte a buaipui ang..

<><><>

MPOX

Principal Secretary to Prime Minister Dr.P.K Mishra hovin Mpox hrileng mek hmachhawn tura inpuahchahna leh hmalakna hrang hrang high level committee-in nimin khan a thlir. He meeting ah hian Pu Mishra chuan Prime Minister chuan Mpox hrileng dinhmun a thlithlai reng a ni a ti a. State tinte chu uluk lehzuala an huamchhung theuhte vil tur leh hrikai an awma rang taka chet la thei tura inring turin a hrilh a. Hri kai hmuhchhuah ran anih theih nan laboratory pawh inralring turin a ti a. Tun dinhmunah rampumah lab 32 ah test theih a ni a ti.

He thutkhawma tarlan danin ramchhungah Mpox hrikai hmuhchhuah an la ni lo a. He hri hi zirchianna lamah chuan nasa taka darh huk theihna a hniam a. Mpox hrikai te hian kar 2 atanga kar 4 an tuar a, damdawi leh enkawlna tha hmang chuan an dam leh thuai thei nia tarlan a ni a. Hri kai nena rei tak inhnaih leh insik avangin inkaichhawn theih a ni.

<><><>